



隨齋紀程卷一



一等編脩官川田剛撰

隨鑾紀程

太政官藏板



隨鑾紀程序
省方懷遠王者盛典
也。然非史臣抽筆為
之記載孰能知其所
以盛乎。去歲辛巳。

車駕巡狩。航北海。至
陸羽諸州。川田編修。
作日記。自山川土田。
物產風俗。以迄修路。
架橋館舍。供頓之激。



歷々備載。足以見
聖化雍熙。遍及邊陲。
况余躬在其間。目擊
衆庶。謳歌來蘓。後后
之狀。披卷一讀。感歎

曷已。剖劂告竣。為題
一言之。

明治壬午紀元節


左大臣二品大勲位

熾仁親王



內閣大書記官從五位
勳五等金井之恭


奉命書



古今非遠觀於片策四海雖闊知於不出
 牖以有良史也川田編修以史臣隨
 駕于東北著隨鑿紀程紀事繁灼彌綸不
 遺時余亦在扈從中亦過山川風土追想
 而不能記及見此編當日景狀歷々在目
 令人躬在其間吁良史矣哉

明治十五年三月

參議兼司法卿正四位勳一等大木喬任



凡例八則

一中興以還。巡幸數次。詞臣紀程。例用所謂假名文者。而此行道路悠遠。所經月日。倍於前次。若假名成文。則字多言長。非僅僅小冊子之所能載。今用漢文。錄為八卷。

一山水勝概。或記或否。而採礦墾田。牧畜蠶織。業屬創開。關民生利病者。列舉靡遺。并記金穀收支。不厭煩細。使讀者一目瞭然。所以仰體於省方。聖旨也。

一六尺為間。六十間為町。陸路以三十六町。海程十七町弱為一里。顧先儒或記海陸行程。概用漢里。漢土一里當我五町十五間三尺一寸強。長短差異。奚翅毫釐。今悉用邦制。若夫鐵道礦山。使洋人開鑿。用彼尺度者。特稱英里。蓋一英里當我十四町四十五間零六寸強。

一曰某掛。曰某組。曰取締。曰改良。此種俗言。違字義者。不一而足。然公私所通用。不可輕改。姑仍舊貫。

一動植庶物。間有漢土所無。卽有之。亦未詳漢名者。皆用俗字。若鯨鮪楯鏑是也。

一此行往還。途經九縣。而北海道及秋田山形兩縣。以省方所主。故別載其地形物產。及政治沿革。名曰總記。

一行宮處所。行程里數。見官吏。褒士庶。觀物產等項。作表具載。而從幸官員姓名。亦載別表。並為附錄。

一此編辛巳起草。明年脫稿。會罹目疾。久委麗

底既而疾癒。淨寫事涉三歲。若北海道船政稅法。猪苗代湖疏水工事。那須原開墾始末。後據數種圖書。以補正初稿者。往往有焉。因再校付之剞劂氏云。

明治十八年春三月

川田剛識

隨鑿紀程目次

第一卷

起七月三十日發東京止八月十二日達宮城縣治

第二卷

起八月十三日駐蹕仙臺止二十七日達青森縣治

第三卷

起八月二十八日駐蹕青森止九月八日

再駐 蹕青森

第四卷

起九月九日發青森止二十一日回 蹕院

內驛

第五卷

起九月二十二日發院內止十月十一日歸東

京

第六卷

北海道總說

第七卷

秋田縣總說

第八卷

山形縣總說

附錄

隨鑾紀程卷一

一等編修官兼攝內閣大書記官從五位川田剛撰

丙子夏。

車駕東巡磐陸未及兩羽北海道士

庶望霓。籲請不已。今茲辛巳秋。將省方以慰輿情。

先期布告中外。內閣奉

旨。選扈

駕臣工。

儀衛務從簡畧。又分遣官吏。察沿道地形。及驛站
廣狹。物力豐約。因頒條令於令牧曰。觀風察治。要
施實惠。道路橋梁。才通車騎。行營芟舍。苟庇風雨。
不必加修治。過為粉飾。飲食使役。官給其直。奇寶

珍玩不許進獻。四民安堵。勿廢生業。其老幼扶攜。拜觀威儀。不必呵斥驅逐。孝悌力田高年。及才學超衆者。具狀以聞。其往年經臨沾恩典者。不在此限。既而所遣官吏。還奏地方情狀。乃慮北陬荒僻。供頓百需。或難措辦。即日勅減扈從人員五分之一。嗚呼。聖仁如此。億兆顙望。以俟來蘇。不亦宜乎。

七月三十日黎明。上御便殿。文武百官隨班進謁。賜酒饌畢。陸軍伶工奏樂。儀仗儼然。啓行自正。

門警視方面監督一員。率巡查長廿餘騎前驅。近衛騎兵二員。左右並進。繼以伍長騎兵十二員。四行成列。曹長手擎菊章紅旗。騎兵四員列其後。將校十二員。分爲二行。乘輿駕駟。驥宮內卿臣德大寺實則。驂乘奉劍璽馬。騎兵六員。護衛左右。次皇太后。次皇后。各御鑾輅。侍女驂乘。衛兵各六騎。後拒十二騎。四行成列。軍醫馬醫連轡繼之。次宮女若干人。次侍從四員。次侍醫二員。次式部頭。次皇太后宮大夫。皇后宮大夫。次宮內。

書記官。次左大臣二品有栖川熾仁親王。二品北白川能久親王。次參議臣大隈重信。次內閣書記官。次一等編修官。次內務及大藏書記官。次驛遞官。次東京府知事。凡文官乘車。武官乘馬。而騎兵執槍旗。頭帽飾以白氈。鬚鬚然與旗影相映。其從在鹵簿外者。皇族大臣勅任官等。車騎數十乘。巡查長二騎為之殿。入四谷門。由半藏門。過萬世橋。循忍岡北渡大橋。清蹕所臨。陸海軍兵排列。捧銃。奏任官及華族神祝。臚立道左。磬折拜送。邸

第市廛。軒揭旭旗。士女雲集。觀者如堵。已刻頓。千住驛。千住或作千手。相傳鎌倉名姬千手所生。以其郊於大都也。戶口繁庶。街巷交錯。近鄉人來鬻野蔬川魚。朝市頗盛。擔夫販婦。與冠蓋相雜。一驛喧填。立錐無地。午刻。啓蹕。兩宮皇族以下送者。從此辭去。其從幸者。親王二人。勅任官五人。奏任官三十六人。判任官八十餘人。騎兵五十八人。并胥徒廝養。凡千二百餘人。大道一髮。彌望稻田。豐兆可喜。過保木間村。入埜玉縣界。縣

吏迎候。率巡役以先導。前路爲例。後不復贅。行里餘。次草加驛。縣令白根多助。病不來謁。使大書記官吉田清英上賀箋。此行余以本官兼攝內閣書記事。與金井大書記官及僚員川邨正平。藤本周三。楫取道明等九人。偕同宿歇。大書記官名之恭。字子誠。號梧樓。慷慨尚義。兼工書法。夕就館舍。溽暑多蚊。與大書記官微行納涼。人家數百。揭旗張燈。歌呼雜沓。有叫賣。巡幸鹵簿圖者。歷舉大臣參議以下位階俸祿。唱到吾輩姓名。不覺相顧。

一笑。過兒玉天兩旅館。天兩名彰。字有常。風流儒雅。尤精賞鑑。以宮內文學從。閑話數刻。還則街拆已報二更矣。

三十一日。晨起結束。詣

行宮則

乘輿既駕

馳車出驛。行循綾瀨河。河東有古谷宇村。東鑑承久三年寄附武藏國古矢宇鄉於鶴岡八幡宮。卽此矣。渡板橋。一路塵泥。草木含露。蓋昨夜過雨。吾輩熟睡不覺耳。水田多芙蓉。花氣薰人。或疑其損收穫。余嘗讀爾雅釋艸。芙蓉一名荷。其莖茄。其葉

蓮。其本密。其花菡萏。其實蓮。其根藕。其中的的中
薏。無一不直錢。又徵之本縣圖帳。沿道七村。蓮田
十一町五畝。歲採其根七百十四駄半。直金三千
五百七十二圓五十錢。若種杭稻。一段率收米一
石五斗。直金十五圓。乘以一一零五。得金一千六
百五十七圓五十錢。則所獲不及其半。況此特就
根言之。而花葉莖實不與焉。種蓮之利亦大矣哉。
越谷驛與大澤驛。中隔一水。曰本荒川。東有桃林。
花時紅霞映天。都人往往裹糧來遊。管子曰。五沃

之土。菓宜種桃。今隴圃種桃。鬻其實。所獲亦贏於
種麥。然非地。邇都會。需用多。而搬運便。則不至於
此。講貨殖者。尤宜留意焉。二里抵糟壁驛。糟壁春
日部音相近。據地誌。元弘中。新田義貞部將春日
部時賢從攻鎌倉。有功。食此土。時賢神皇正統記。
增鏡。梅松論。太平記諸書。無所見。況是役。賞義貞
以上野播磨。而足利尊氏封常總及本州。則義貞
割予其土。恐無此理。是日午熱。華氏寒暑表外至
九十四度。衆渴甚。入清地村。憩於郡署。密樹遮日。

風度田疇。內膳頒給冰塊。味美於仙漿。經杉戶。次幸手驛。茨木縣令人見寧。攜木縣令藤川為親。大書記官片山重範來謁。此距東京十三里。戶口與糟壁越谷相若。館小林氏室宇器具。雅潔可愛。往年木戶內閣顧問從。幸宿於此。匾額大字即其手蹟。顧問中興元勳。翰墨小技亦臻妙境。而今則亡矣。余奉勅撰其神道碑。擬以裴度。蓋非溢美也。縣吏佐藤弘毅等來訪。主人勸酒。俱乞揮毫。金井大書記官乘醉連書十餘紙。余亦題

途中一絕。

八月一日。離驛右折。長堤沿水。上游利根川。發自上野利根郡文珠嶽。逶迤數十里。分為兩派。一則東經總常注銚子口。一則南流經此。自關宿至行德入海。水勢尤悍。天明中。暴漲潰岸。闔郡民殆乎化為魚矣。幕府起徒塞決口。時封建為制。沿岸村落各異所轄。不得疏塞。修築隨便下手。埭壩迂回。長六千間。其當水衝處。護以鴈齒椿。又貯囊沙一千苞。囊繩三千束。豫備不虞。而秋夏水滂。輒致壞崩。

人畜漂沒。歲被巨害。王室中興。舉河西一帶地。悉隸本縣。土豪池田鴨平。中村元治等。欲協衆力。大興土功。首唱捐貲。遠邇響應。官嘉其舉。遣吏監督。乃於高須賀東。橫築大堤。以接權現堂堤。長七百六十一間。高一丈三尺。廣五丈九尺。強設二閘。長各十八間。一防逆流。一遏汙水。乙亥六月廿日起工。十月三日告竣。所費金一萬八千四百二十九圓。內仰官給者二千四百七圓。其餘盡課之沿岸百餘村民。所課多寡。視水害輕重。多者率田

十石。出三十三圓三十四錢。寡者二圓二十五錢。翌年東巡。召鴨平等賜物。命曰行幸堤。詞臣近藤芳樹撰碑文。今碑成。閱四歲。汙萊化為良田。防水工費。歲減數百金云。北行里許。則栗橋驛。幕府嘗設關。譏察行旅。今廢矣。利根川水闊岸遠。不辨牛馬。作浮梁。連舟數十隻。敷以木版。坦如大路。至尊徒行。衆踵其後。中流仰見彩雲映天。魚龍花卉。現種種狀。蓋土人迎幸相慶。作烟火戲也。浮梁一名橋船。詩所謂造舟為梁是也。爾雅釋水。

天子造船。諸侯維舟。大夫方舟。士特舟。庶人乘泚。造比舟為橋也。維連四船也。方併兩船也。特單船也。泚即桴。併木以渡也。夫周室封建。尊卑異制。百事皆然。今聖主親民。視同一家。津梁來往。與衆共之。儒者尚古。謂後世決不及三代。何其迂也。東岸中田驛。屬茨木縣。路夷土軟。行松遮日。北有瀨沼。周圍里餘。南有大山沼。闊數倍。並多產魚蝦。蓴菜。古河驛。人烟稠密。與野木驛隣。茨木橋木兩縣所分。有野木宮焉。祀菟道稚郎皇子。六代勝事。

記。志田義廣謀舉兵。攻鎌倉。源賴朝命八田知家。小山朝政等擊之。與戰於下野國能毛宮原。東鑑。文治二年。以下野國寒川郡地十五町。為日光山三昧田。去年舉本郡。寄進野木宮。宜割而予之。和名抄。又有努宜鄉。努宜能毛與野木音相近。此地古為祀田。屬寒川郡。今屬都賀郡。是日酷暑如昨。憩友沼法音寺。驟雨一霎。人馬蘇息。經真間田。晚次小山驛。水戶裁判所長松本正忠上事務一覽表。使左大臣及大隈參議。金井大書記官。高辻侍。

從兒玉文學等。明朝早發。臨視大崎商社。從縣吏請也。西鄉山田三好曾我野津諸將。至自東京。高島少將。至自仙臺。並進謁。奏明日野營練兵事。本驛距縣治三里。戶口視古河。三分減二。北有小山。氏城墟。慶長中。德川內府東征。駐營焉。會關原變起。回師。戡敵。子孫開府。執國命者十五世。今上親政。桀狗吠堯。所謂彰義隊。艸風隊。七聯隊者。屯聚二總兩野間。遂陷結城。來據此地。彥根藩士青木賴實等。與諸藩兵分道進攻。敵佯敗誘之。

精銳二千。散布環擊。賴實等力鬪。死者若干人。余嘗製其首塚碑文。頗知顛末。因召父老。問以當日戰跡。掉頭不答。曰。連年豐熟。謳歌載塗。官何用談兵為。蓋諸將治不忘亂。父老口不談兵。彼此兩得其宜。夜雙眼眯矇。招伊東侍醫。洗以藥水。曰。流汗入臉。為風塵所侵。若早行避。午熱則不藥而瘥矣。二日。曉雨。蓐食上程。蓋車駕朝發。例用七點鐘。擊柝警衆者三。第一柝傳餐。第二柝立班。第三柝啓行。奏任官候階下。而除近侍護衛外。行無次序。

獨大臣參議。及內閣書記官。從在鹵簿後。途中有
事。復逆取裁焉。余與金井大書記官。交番執役。今
以目疾得請先發。過羽川而小金井。而石橋。而雀
宮。每驛相距一二里。松杉夾路。深泥沒輪。達宇都
宮驛。街衢四通。人家櫛比。間有累石成屋牆者。東
山志云。驛北山多輓石。截為瓦桶。可施釘鑿。問之
土人果然。此地古稱池邊鄉。見和名抄。以其有神
祠曰宇都宮者。故更今名。源鎮將之征陸奧也。藤
原宗圓祈捷有效。因補州守。築城居之。子孫襲業。

以祠名為氏。若八田氏。小田氏。多功氏。橫田氏。鹽
屋氏。武茂氏。皆其支族。而紀清兩黨隸焉。有治部
大輔公綱者。以驍勇著於元弘建武間。六傳至國
綱。忤豐關白旨。國除。江戶開府。更封勲舊為藩屏。
寶永以還。戶田氏居此。戊辰之役。為亂兵所據。
王師礮擊。城市偕燬。今十餘年。學校。病院。監獄。警
察。電信。郵便。諸署。擇地構造。市廛繁庶。漸復舊觀。
是日。車駕朝發小山。過午駐蹕本驛。左
大臣至。自大疇商社。具奏其狀。社在驛東南二里。

絹河左右。鑄山石井兩村間。東京府商川村迂叟所設。初迂叟相此土宜蠶桑。與其子傳藏傳衛。率徒來築隄防。墾闢河壩。得田三十五町六段。植桑數十萬本。庚午歲。造蠶室四楹。桑廠十一楹。招信奧上三州精此業者。各試其方。上與奧。涼燠過度。因用信方。果適風土。乃遍勸土人。開拓荒蕪。施以蠶連四百五十紙。桑葉千八百駄。又請官歲頒給桑苗二十七萬五千本。隣里翕然爭趨之。於是築製絲場。衡五間。縱二十七間。取法於海外伊國。運

繅車。以水火機器。製精工省。致其所製於合衆國賽工會。及內國勸業會。並得賞牌。蓋勦業以還。歷十餘歲。所費金十餘萬圓。而中間阻礙百出。毫不屈撓。以至於此。凡氣罐二。水車二。絲竈百九。工女百九十三人。工夫二十三人。一歲烹繭二千石。製絲一萬三千三百斤。大抵販之外商云。夜風雨。

三日晴。

車駕夙發。

行宮。

觀治兵於勝

山城址。址臨絹河。在阿久津北。四面曠野。河水分派。間有林邱。尤宜布陣。蓋陸軍之制。步兵十人為

分隊。伍長率之。二十人爲半小隊。軍曹率之。四十人爲小隊。中尉若少尉率之。四小隊爲中隊。大尉率之。四中隊爲大隊。少佐率之。二大隊若三大隊爲聯隊。大佐若中佐率之。二聯隊若三聯隊爲旅團。少將率之。二旅團爲師團。中將率之。其騎兵。砲兵。工兵等。亦各分部伍。設將校。是役也。東京鎮兵。仙臺鎮兵。近衛兵。及士官學校生徒。合軍人軍屬。無慮七千七百人。以三好中將爲師團演習長。曾我少將。高島少將。並爲審判官。野津少將爲第一

旅團長。佐久間少將爲第二旅團長。土屋大佐爲假設旅團長。軍分東西。而東者主攻。西爲之敵。擬東軍駐本營於二本松。分兵從白河水戶二道攻宇都宮者。諸將進陣於氏家驛。先鋒至阿久津。敵聞警。逆擊之。白澤臺外。別遣精銳。馳過蘆沼。涉東絹河。擊破我右翼。乃發援兵。倚岸放礮。敵遂巡。遂乘勢追躡。漸迫臺下。因縱左翼。東至寶積寺村。將涉絹河下流。繞出敵背。敵據壘岡本村拒之。會驟雨水漲。隔岸礮戰良久。旣而三道並攻。吶喊動地。

敵不能支。引兵而退。特發地雷火以防尾擊。東軍遂取白澤臺。已刻戰畢。過午回。蹕宇都宮。東京電報後宮舉。皇女。衆官上賀箋。是日。勅左大臣代巡那須原墾地。相隨者大隈參議。及金井大書記官。東園侍從以下若干人。大木參議。至自東京。參議本在扈從員中。遭疾後期。是夕詣行宮謁焉。

四日。昧爽。啓

蹕。復

觀治兵於稚兒坂。時東

軍據白澤臺。探知敵潛師至祖母井。欲斷歸路。分

一旅團備之。於是西軍在稻荷山下。張左翼於竹林邨南。右翼由今泉。東歷平出原。循絹河來。與我兵爭取岡本。力鬪數回。而中軍騎兵進略海道村。我騎兵遇之。衆寡不敵。下馬放火林莽。步兵一隊乘輜車疾馳赴援。敵奮戰鋒不可當。乃別遣步騎。從大塚村。進擊其右翼。又發奇兵。航涉御用川。以衝其背。敵據險力拒。兩軍酣戰。出沒於岩本關掘兩村之間。日已加巳。師團長傳令收軍。蓋昨日操練。以東軍為主。西軍所率僅三四中隊。假作一旅。

團視之。進止勝敗。彼此豫期。名曰假設敵法。而今則東西兵馬。員同勢均。方畧相秘。竒正變化。各鬪智勇。名曰不期對抗法。不期者。不豫期約之謂。對抗者。兩陣角力之謂。雖礮不丸。兵不刃。而往往奮進。不顧死傷。故設審判官。臨場制止。及事畢。就全軍舉動。判其勝敗。論精律嚴。足以服衆心。唐書禮樂志。中冬講武於都外。大將被甲乘馬。教習士衆。第一第二挑戰。迭爲勇怯之狀。第三挑戰。爲敵均之狀。第四第五挑戰。爲勝敗之狀。以今視古。彼直

兒戲耳。未初回

蹕宇都宮。召親王。參議。宮內

卿輔。陸軍諸將。侍食

行宮。余與川邨正平。游

覽市街。一丘隆起。拾磴百餘級。上有神祠。所謂宇都宮者是也。靈驗赫著。載在舊志。幕府重建。寄祀田千五百石。戊辰兵燹。殿宇蕩然。近歲更造。規模仍舊。其欄干護朽。銅質鍍金。雕慶長十年七月吉日建立。征夷大將軍源家康云云。數十字。昔日壯麗可想。按延喜神名式。下野國河內郡有二荒山神社。二荒後作日光。距此七里。在中禪寺湖側。以

其地今屬都賀郡。或有謂此卽二荒神社者。近藤芳樹從幸日記亦主其說。然徵之續古事談曰二荒山有湖。廣可千町。本社在山頂。宇都宮爲其支祠。則彼此各別。其曰河內郡者。古今郡界更革。猶野木宮之於寒川郡。芳樹博雅尤明神典。今亡矣。恨不得起其人於九原以質疑也。

五日發宇都宮。二里抵白澤驛。驛外卽昨日治兵處。絹河發源日光山下。絹湖與大谷川合。南流十餘里。至此分爲兩派。中夾一洲。末復合入利根川。洲

南北里餘。東西半之。桑圃菜畦。區爲四村。居民四百餘戶。續日本紀。神護景雲二年八月。防毛野川。常陸風土記。新治郡。西以毛野川爲界。絹與毛野。方音相通。回國雜記。發宇都宮。到絹河。卽此也。河北聚落曰阿久津。陸羽方物。馬馱至此。舟運達東京。過氏家驛。地勢突起。天文十八年。那須高資與宇都宮尚綱戰於此。高資部下鮎瀨彌五郎射殺尚綱。因名彌五郎坂。地舊險阻。近者起徒削平。閱十有五月告竣。四分其費。官給一。而民辨三焉。坂

北喜連川驛。舊喜連川氏所治。人家一簇。夾以二水。曰荒川。曰內川。石聳流淺。多產香魚。義經記。過行方原。渡狐川。古合稱二水。曰狐川。喜連即狐音轉訛也。次作山驛。逆旅多畜娼。東游雜記云。鬻娼賤業。而本道諸驛。富民為之。恬無耻色。風習迥不及山陽鎮西。信哉。是夜乞書者羣至。辭以目疾。黑羽人三田稱平。上巡幸頌一篇。稱平別號地山。隱居授徒。著作自娛。嘗與余相識。因遣使來訪。黑羽距此三里。舊大關氏治所。

六日。出驛渡箒川。行里餘。古松林立。中通大路。經太田原驛。渡蛇尾川。崖樹蓊蔚。清流迂回。東與箒川合。入那珂川。上游自鹽谷郡大佐飛山至。墓沼潛入地底。三里復發。注於此。夫河發崑崙。伏流一萬三千里。其誕辨於河源志。禹貢。沱潛既道。括地志。潛水一名復水。今名龍門水。梁州記。葱嶺有石穴。高數十丈。其狀如門。俗號為龍門。潛水自此入穴。通山。伏流重出。蜀都賦注。建寧有水道。伏流數里。復出。曰漏江。水經注。敎水重源雙發。南至西馬頭。

山東截坡下。又伏流南十里復出。謂之伏流水。然則此水曰復水。曰漏江。又曰伏流水。可也。至乙連澤。路左小邱宜眺矚。上設惟宮。四顧曠野。青草連天。羣山綿亙其西北。而五峯競秀。是為那須嶽。此地東西八里。南北十三里。古建為一國。

景行帝以建沼河孫大臣命為那須國造。見國造本紀。建久中。源右將游獵三日。起徒數千。射殪大鹿。今地曰狩野。曰夕狩。曰箭坪。蓋其遺迹也。嶽麓有村曰湯本。溫泉出焉。那珂川發源其西。眾溪合

注為奔瀨。經鍋掛越堀兩驛間。南流二十里入海。越堀以北。山谷崎嶇。呼為二十三盤。

皇上騎行。眾皆徒步。是日炎熱。汗透衣衫。渡黑川橋。蜿蜒登至山頂。有小亭。移御榻。進水塊。亭

面東南。峰巒起伏。來路所經。歷歷在目。余呼縣吏。指點問名。已而擊柝一聲。衛騎簇擁下坂。渡奈良川。酉刻次蘆野。荒驛也。負山傍溪。茅茨連簷。間亦私寓宿娼。館人持箋乞字。余戲題一聯曰。荒驛連程稀粉壁。青山到處有紅裙。蓋寫實況也。左大臣。

大隈參議等。至自那須原墾地。地在太田原西。荆榛荒蕪。世斥為不毛。其首倡墾開者。曰那須開墾社。本縣豪農印南丈作。矢板武等所創。請官借地三千町。富者捐貲。貧者助力。其墾為田圃者二十四町。種種陸甘薯蕪菁蕎麥玉蜀黍。為林圃者二百町。種桃柿檜松。及雜樹一萬一千五百本。造農舍。畜舍。耕具舍。乾草舍。各一區。飼馬八匹。牛十頭。經費金五千二百餘圓。曰西肇耕社。麿島縣士族三島彌太郎。及福島山形兩縣吏員。集金所開。亦

借官地一千町。其為田圃者六十町。種桐者二十町。為牧場者六百六十四町。為道路若溝洫者五十町。方募佃夫新墾者五十町。經費金一萬二百餘圓。並去秋開創。今僅九閱月。而成功如此。他年之業可知。各賜金褒之。具奏其狀。

七日入山村。草舍斷續。高田種黍。低田種稻。一溪曲折。五渡畧狹。即奈良川之上流也。村盡有坂。居民數戶賣粉資。呼為千歲餅。路左石壘數尺。上有祠宇。祀衣通姬。稱境明神。野磐二州所分。過祠入福

島縣界。經白坂。皮籠。抵白河驛。有城趾。昔者小峰氏世居之。後爲伊達氏所據。豐關白授之蒲生氏。未幾。又授之上杉氏。江戶開府。丹羽。松平。阿部諸氏更封於此。戊辰之亂。城市俱焚。今民居復舊者。千八百戶。史稱慶長中。上杉景勝通謀上國。舉兵會津。欲誘致德川內府父子於皮籠原。一戰殲之。親率衆出陣。曝背山。扼左勒左勒之險。開道白坂。修築白河城。卽此矣。驛外逢隈川。發於甲子嶺。東北流數里。經石川岩瀨。安達信夫諸郡。至亘理郡。

荒濱入海。渡橋右旋。登七曲坂。過小田川。太田川二驛。踰岩崎坂。日午熱甚。路傍一茶肆。設榻樹陰。井泉感沸。余小憩醫渴。追及

車駕於矢吹笠

石兩驛之間。次須賀川驛。以郡署充行宮。產

馬會社長景山正博等。列馬於庭。以供

御覽。先是土俗耕稼。不殖他產。米穀狼戾。或乏財用。甲戌歲。橋本傳右。石井勝右等。結社畜牧。就縣廳借金三千圓。十年折償。勿納息。又糾股募金。每股金二十五圓。白河。岩瀨。安積。安達。四郡民。應募

者三百八十餘人。得六百二十五股。因定條規。設職員。春秋遣人買牡於水澤。岩手。青森。牝於三春。分付股主飼養。其非股主而欲飼養者。立約借之。游牝產駒。以時巡視。簿錄其數。初秋開馬市於四郡九所。而賣之。一歲兩次。會計出納。更選職員。丙子夏。東巡賜物。褒之。其秋廢磐前若松二縣。併之本縣。縣吏欲令管內二十二郡畜馬者。皆依此法。合為一社。異論紛起。百方懇諭。遂從之。乃設支社於三春。於若松。與本社協力。其業漸盛。據今

春所編簿冊。股金四萬餘圓。加以官金一萬三千圓。合計五萬三千餘圓。有馬十萬九千二十二匹。鬻駒一萬四千七百二十五匹。得直金四十八萬八千八百四十三圓。除去費用。以所贏頒給股主。其利踰什一云。寄居村民有罹篤疾者。欲乞治侍醫。而口難言之。縣吏以聞。上為惻然。遣醫員石井淡診治。賜以御藥。仁哉。是日與左大臣同館。召賜茶菓。話旅況。夜訪伊東侍醫療目。比戶懸燈。加以月光。街路來往明於白晝。

八日朝農商務權大書記官檜原繁以督猪苗代湖
疏鑿工事至於此。召見垂問其狀辰刻啓

蹕渡釋迦堂川。圮橋長二百四十尺。上游灌水陰
鬱層崖臨水有二階堂。氏城趾焉。踰赤坂涉滑川
笹原川。抵郡山驛。往年火災人家多為灰燼。

上憫然命有司議賑恤。又遣荻侍從巡視桑野村
墾田。此地屬安積郡。原野廣闊。古建為一國。國造
本紀。安康帝時。以天湯津彥十世孫比止禰

命為阿尺國造。阿尺即安積。今驛內有安積國造

神社。神裔世為祠官。故幕府儒員安積良齋。蓋比
止禰命五十四世孫也。相傳源鎮將東征。駐營於
此。招千僧誦萬部法華經。以祈賊徒降伏。因樹曼
陀羅碑。又有平忠通者。寬治之役。為副將。卒於師。
土人立祠祀其靈。謁祠觀碑。崇六尺餘。上刻梵文。
漫漶毀缺。獨治歷三年丁未二月。良喜了阿教圓
賴圓兵衛尉充物云云廿四字。可得而讀。然忠通
事不見舊史。碑亦非八百年外物。聞田間有伊藤
肥前碣。其文宋僧高京所撰。以後。駕故不得

造觀。過福原驛。西有山井。及采女塚。踰日和田坂。右曰安積山。左曰安積沼。皆傳會古歌。其實遠在數里外。萬葉集。葛城王奉使陸奧。憤國司迎候亡狀。臨宴色不喜。有前采女。捧觴詠安積山影映井泉句。王乃釋然。按古置采女司。擇郡領女。若姊妹。容儀端正者。入掖庭。大寶二年。詔令筑紫七國。及越後國。簡點采女貢之。但陸奧國勿貢。此曰前采女。則事在大寶前後。當時稱葛城王者三人。其一與高麗僧慧總游浴道後溫泉。見伊豫國風土記。

其二白鳳八年秋。以從四位下卒。見日本紀。其三和銅八年。賜姓橘宿禰。改名諸兄。後為左大臣。叙正一位。見續日本紀。及姓氏錄。僧契仲加茂真淵等。注萬葉集。並闕疑。不指名其人。獨日本史定為左大臣。無乃太武斷乎。日午驟雨。踰五百川。仰見峻峰拔地。雲烟吞吐。即萬葉集所謂安達太良山是也。坦途里許。聚落沿水。曰本宮驛。驛北渡杉田川。坂路登降。酉刻次二本松驛。市街循山。長可一里。昔者足利氏以其族畠山高國為陸奧探題。曾

孫滿泰始城於此。稱二本松氏。五世孫義繼。為伊
達輝宗所攻。佯降。躬與壯士數騎詣其陣。相見禮
畢。輝宗送到階下。壯士左右起。執以去。變發倉卒。
一陣狼狽。輝宗子政宗出畋野外。聞報來救。輝宗
大呼曰。阿梵。勿以乃父故縱敵。政宗追躡放銃。義
繼遂殺輝宗而自刃。阿梵政宗小字也。事在天正
十四年。居數歲。豐關白東征。以城授蒲生氏。江戶
開府。松平氏加藤氏更封於此。寬永以還。丹羽氏
世居之。今藩廢。設製絲場焉。場廣三十六町。屋舍

十九楹。甄竈百六十八座。工女二百四人。一歲所
造絲。大略一千四百四十貫。得直金十萬三千八
百七十餘圓。初安達信夫二郡以蠶桑名海內。獨
繅法未精。奸商射利。攬雜欺人。頗減聲價。豪商小
野市兵。安齋宇兵等。欲一洗弊習。遣人往富岡製
絲場。講究其術。試之茲土。果得適宜。創立會社。募
集金五萬圓。分為二千股。每股二十五圓。又借官
金四萬三千餘圓。招女繅師。設職員。會市兵宇兵
有故破產社員佐野理八代為社長。更定規約。拮

据龜勉。試以所製生絲。販之海外。號為精良。是日左大臣以大隈參議。金井大書記官。田邊內務大書記官。東園侍從等。巡覽工場。據社長所上計表。癸酉開社。至乙亥。得失不相償。耗金四千餘圓。丙子而後。漸生贏利。以迄去歲。所獲殆五萬千六百圓。則其業之趨盛大。可知矣。晚游安達原。出驛右折。取路莽草。路傍沮洳。荷花盛開。涉逢隈川。行數百步。喬木陰森。怪巖盤踞。名曰黑塚。側有古寺。老尼迎客。說舊事。曰昔有夜叉。啖人行旅。過此。莫不

殞命。一夕高僧祐慶投宿。以觀世音威德。調伏殺之。埋尸巖下。今寺中所安觀世音像。卽是也。因出烹兒鍋。屠人刀。種種遺物。示之。為發一噱。還訪大隈參議。談古今經世要務。

九日。朝發。過松川。清水二驛。達福島縣治。行程三里。踰坂十三。其峻者曰雙柳。曰大鳥。曰市野。曰彌陀。而伏拜坂為最近者。土人興工開削。化為坦路矣。涉水六。皆細流也。獨須川發源吾妻嶽。合荒川。天戶二水。東流五里。入逢隈川。兩涯相距百餘間。架

板橋。橋東卽福島。舊板倉氏所治。當陸羽孔道。地宜蠶桑。綿繭綺縠。物貨輻輳。及外國通商。輸出生絲。歲收巨利。肆廛櫛比。戶口繁庶。今夏回祿。一市蕩盡。駐蹕醫校。是日炎熱九十餘度。

行宮瓦甍。濺水取涼。二品親王游逢隈川。獻其所網香魚。

十日辰刻啓

蹕經瀨上驛。涉摺上川。信夫伊達二郡所界。平沙渺茫。水分三派。入逢隈川。踰薦僧壇坂。則桑折驛。停駕於無能寺。庭松張蓋。蔭

數十人。杉宮內大輔賦國詩上之。因摘取其句。命曰御蔭松。驛北半田山。有銀坑。二品親王與大隈參議往視焉。從行者余及金井大書記官藤波侍從。北條侍從等若干人。礦師導至坑口。口廣方丈餘。深不知幾千尺。取路口外。攀至山腹。廠舍連軒。內設蝦蟆爐。坩鍋土甑。有搗礮者。有鎔鉛者。有鹿皮囊漉水銀者。蓋本坑創開未詳其年代。寬文中幕府置銀山奉行。聚徒採掘。歲得銀數千貫。與佐渡金山但馬銀山。並稱爲海內三大坑。然歲久衰

廢。眾病凍餓。有富民早田某者。捐貲再興。居無何。其孫武助。與工夫十三人入坑。中毒死。其業遂廢。近歲薩人五代友厚。請官借地。復試開採。而淘洗煎煉。悉用洋法。又取昔時所棄之礦砂。製為純銀。大得贏利。其坑道通塞。器械良窳。以至出納得失之微。具載丙子東巡錄。今不復贅。出廠門。又登十町許。喉喘體汗。絕頂設榻。供冰塊。是山嶄然遙隔曠野。與靈山相對。靈山者。延元中鎮守府將軍北畠公所據以禦賊。余為親王說。當日戰略。良久下

山。憩於早田氏。未刻過藤田驛。渡龍川。地勢隆起。峻坂重疊。號曰伊達大木戶。木戶即關塞也。相傳昔者坂上將軍防蝦夷於此。左有國見山。循山而登。茅茨數十。曰貝田驛。東鑑文治五年源二位東征。藤原泰衡據險於厚樫山。與國見驛之間。鑿長塹。以引逢隈川水。厚樫山一名國見山。貝田即國見驛。山下長塹。宛然尚存。踰一坂。則磐城州。有驛曰越河。封建時為仙臺藩南境。今屬宮城縣。從此以北。山路屈曲。曰白鳥坂。曰摩鐙坂。舊病險隘。近

日削平。優通車馬。齋河發自國見山。北合衆溪。東
注入白石川。怪巖古木。地幽流清。產異蟲焉。色白
形肖蜈蚣。治小兒疳疾。土俗婚禮。例充盤餐。祝子
孫繁衍云。河北小驛。亦名齋河。東行里許。下新館
坂。西刻次白石驛。舊仙臺藩老片倉氏采邑。
中興收封。置按察使府。府廢。撤城郭。墾爲桑圃。圃
外市廛六百戶。木片葺屋。上載石塊。詢之土人云。
大雪酷寒。瓦輒凍裂。而木片或爲烈風所捲去。故
藉重鎮之前路驛站。大抵皆然。非獨此地也。夜召

福島縣吏。賚金於其治下及郡山民罹災者千八
百七十二戶。

十一日。早發先

駕渡大橋。長四百尺。白石川發

自楢下嶺。合橫河戶澤二水。東北流十餘里。入逢
隈川。陳塲山有世良砥德墓焉。砥德通稱修藏。長
藩人。初癸丑甲寅間。幕府政衰。內外多故。列藩分
黨。大抵關西主勤王。關東佐幕府。幕府乃遣會侯
松平容保。爲京師守護。鎮壓畿甸。及今上親
政。薩長入參密議。首罷將軍守護諸職。會人缺望。

伏水之役。實主其謀。而事敗還國。據險與幕兵拒命者。聲勢相援。於是六師征討。以左大臣九條道孝為奧羽鎮撫總督。砥德參軍事。駐營仙臺藩。藩主伊達慶邦。所謂佐幕黨者。其老坂時秀。但木成行等。惡薩長用事。與米澤盛岡以下二十餘藩大夫。集議白石。君臣連署奏狀。為容保訴寃。總督却其書。更命進兵。眾憤激。謂總督肉食貴紳。不必主戰。砥德與會人挾私怨。彼若不死。禍亂不已。乃遣壯士戕之。福島客館。持其首還。梟示半日。埋於此。

嗚呼。堂堂大國。為列藩所推。不辨名義。察時勢。顧欲藉手刺客。以成大事。則一敗瓦解。不足異焉。然封建歷世。政在大夫。異日朝議。誅止首謀。不絕其祀。仁矣哉。涉棄兒川。或告以勝母柏人故事。余笑曰。王者保赤子。人棄我收。何不可之有。至宮驛。旭日三竿。顧見紅旗閃閃。與行松相掩映。車駕近在數百步內。乃馳渡松川圮橋。踰觀音坂。循葛籠巖。降小豆坂。坦路三里。經四驛。曰金瀨。曰大河原。曰船迫。曰槻木。文治之役。藤原國衡欲踰

大關山奔羽州。日暮馬陷泥淖。和田義盛射中左膊。大串三郎揮刀斫之。獲其馬。傳首於船迫營。今國衡墳在金瀨西。而田間瀦水。呼為獲馬湖。卽其遺跡也。路右清流三叉。白石川與逢隈川合。沿岸地闊。田疇決滯。西南連山。不忘峯尤為峻秀。宗久紀行。渡逢隈川。遙見孤峯吐焰烟。問之舟師。云。兵亂以來。見此怪異。徵之名蹟志。不忘峯灰沙堆積。有時吐烟。卽所謂噴火山耳。次岩沼驛。舊仙臺藩老古內氏采邑。今春回祿。市街未復舊。驛內竹駒

神社棟宇宏壯。是日以社務署為
於罹災者九十七戶。

行在。資金

十二日。復先

駕曉發。殘月在天。樹影婆娑。單車

趁涼。如輕舟行荇藻中。黎明過增田驛。有富民菊地善藏者。往年車駕臨憩其家。庭松偃蹇。蟠地。賜名衣笠。邦言華蓋謂之衣笠。今視其樹。宛然華蓋矣。驛西鹽手村有左近衛中將藤原實方墓。實方工歌詞。嘗作花陰避雨句。世稱絕調。藏人頭藤原行成忌其才。譏以驕慢。一日與爭論於廷中。

實方怒取其冠擲地。遂坐不敬。責授陸奧守。蓋文人相輕。誰昔乃爾。但怒者心直。笑者不測。源子和不取彼而取此。先獲我心也。名取川多產鱒。鮭水源數派。發自盤梯。笹谷青根諸山。至桑石西。聚爲一水。逕中田驛。北合廣瀨川。東注入海。南岸設帷宮。矢魚中流。過圮橋。則長町驛。隔廣瀨川。與宮城縣治相接。縣治卽舊仙臺藩。有政廳焉。有鎮臺焉。有裁判所焉。有監獄署。集治監。囚獄所焉。勸工場一。養蠶試驗場一。師範校一。中學一。小學十三。

幼稚院一。病院一。醫校一。電信分局一。郵便局一。神社佛寺百六十一。街衢二百四十。儼然一方之大都會矣。就館於國分坊。有人倒屣出迎。則門人齋藤弘也。攜手入堂。坐席始定。飯田定長。谷文等相踵來訪。定安中人。文吾。高粱人。並以司法判事官於此。弘字士貞。號巖城。津輕人。嘗在東京。從余學文。旬日前來補師範校教員。余覲數子。先問地方勝概。雅談移時。俄而喇叭數聲。萬衆傳呼曰。鑾輿至矣。乃起迎之中。遶瓦屋櫛比。綠門紅旗。路

撒白沙。縣吏先導。鎮兵捧銃。學校生徒正服臚立。而士女拜觀儀衛者。遠至自十數里外。肩摩轂擊。羣聚如雲。已刻駐。蹕國分坊。未刻。

幸花壇。牧師牽駿馬二百匹來供。御覽。是日。

余與定文等。避午熱於杉本檢事寓樓。檢事名重遠。館林人。其妻舊高梁藩老大石如雲之女。以余爲父執。故接待款曲。情同家人。樓隔市塵。樹繞竹圍。疎雨數點。清風襲坐。置酒唱和。亦客中一樂事也。雨歇。游躑躅岡。老櫻數十株。大皆合抱。傍有別

館。往年

東巡所停

蹕。入喫一椀茶去。散

步市街。街窮有橋。斷崖數丈。一水滾滾。來自西北。卽廣瀨川之上流也。水北曰青葉山。慶長中。伊達政宗領西奧二十一郡。始城於此。更稱仙臺。子孫襲業十餘世。以至慶邦。先是諸侯三百。推加薩仙臺爲大國。加領百餘萬石。薩七十餘萬石。而仙臺六十二萬石。封境東西三十里。南北六十里。巨室秩萬石以上者十一家。各有采邑。地廣土沃。實收租額百四萬石。加以魚鹽蠶牧之利。其富與加薩

相伯仲。然治平歲久。俗趨游惰。造鈔鑄錢。國計不支。申酉大侵。餓莩載塗。糶糶稱貸。仰給商賈。近歲一二志士。欲革弊制。會王政維新。割其地置桃生。登米白石三縣。授慶邦子宗基。以所餘二十八萬石。仍為仙臺藩知事。明年廢藩撤城。設陸軍鎮臺。於是士衆離散。朱門粉堞。率皆壞圯。過者愴然。有桑滄之感。橋南公園。肉肆茶店。間以戲場。踰索。都盧。唐梯。躍圈。鐘鼓喧沓。觀者如堵。有前哲林子平碑焉。子平名友直。以字行。號六無齋。慷慨憂

國。藩老佐藤伊賀奇其才。詢以時務。子平陳富國策。後又著海國兵談三國通覽。切論海防利害。幕府嫌忌。命錮其家。以寬政五年歿。墓在舊城北龍雲院。此碑建於慶應元年。藩主慶邦篆額。儒臣大槻清崇撰文。是時四方多故。國用不給。蓋追襲其先見也。清崇字士廣。號磐翁。師事賴山陽。以能文稱。長余三十歲。顧為忘年友。向者列藩同盟拒命。飛檄行移。多出其手。事敗繫獄。後遇赦東游。過吾廬。余曰。陳琳筆醫頭痛。恨其為阿瞞用也。磐翁笑

曰。吾唯恨世無阿瞞耳。此老倔强如彼。而今為泉
下人。惜夫。夜大雨。詣行宮。請賜假兩日。探鹽
竈松島之勝。見許。乃還旅館就寢。則夢魂已在烟
波浩蕩間。

隨鑿紀程卷一

